

LUTRIJA BOSNE I HERCEGOVINE d.o.o.
UPRAVNI ODBOR

Na osnovu člana 16. Zakona o igrama na sreću („Sl.novine FBiH“, broj:1/02. i 40/10.) i člana 13. Statuta Lutrije Bosne i Hercegovine d.o.o. Sarajevo („Sl. Novine FBiH“, broj:43/03.) Upravni odbor Lutrije Bosne i Hercegovine, na sjednici održanoj dana 04.09.2012. godine, d o n i o j e

P R A V I L A
I G R E N A S R E Ć U B I N G O J O K E R

I. OSNOVNE ODREDBE

Član 1.

Ovim se Pravilima propisuju uslovi za priređivanje dodatne i neobavezne igre Bingo joker u igri na sreću TV Bingo 15 od 90.

Član 2.

Igra na sreću Bingo joker (dalje:Bingo joker) je brojčana igra s izvlačenjem dobitnog petocifrenog broja putem naprave (bubnja), u kojoj se unaprijed utvrđuje visina fonda dobitaka i njegova raspodjela.

Član 3.

Za obveze prema igračima, priređivač odgovara svim svojim sredstvima, ako su ispunjeni uslovi utvrđeni ovim Pravilima.

Član 4.

Ova Pravila jesu isključiva zakonska i pravna osnova za zaključivanje ugovora o učešću u igri Bingo joker.

Ugovor iz stava 1. zaključuje se između Lutrije BiH (dalje: priređivač) i učesnika (dalje: igrač) na osnovu prihvatanja opštih uslova propisanih i sadržanih u ovim Pravilima, po slobodno izraženoj volji igrača, uplatom igre TV Bingo 15 od 90, te obilježavanjem znakom „X“ jednog od tri polja (sa oznakom 1,2,3) pored riječi Bingo joker, ili usmenim zahtjevom za odigravanje jednog, dva ili tri broja igre Bingo joker i uplatom Bingo joker brojeva ispisanih na izdanoj potvrdi.

Ukoliko igrač znakom „X“ obilježi broj 1 pored riječi Bingo joker, učestvuje u igri Bingo joker sa brojem koji je otisnut pored riječi Bingo joker.

Ukoliko igrač znakom „X“ obilježi broj 2 pored riječi Bingo joker, učestvuje u igri Bingo joker sa dva broja: prvim brojem koji je otisnut pored riječi Bingo joker i drugim brojem kojeg generiše softver slučajnim odabirom (quick pick).

Ukoliko igrač znakom „X“ obilježi broj 3 pored riječi Bingo joker, učestvuje u igri Bingo joker sa tri broja: prvim brojem koji je otisnut pored riječi Bingo joker, te drugim i trećim brojem koje generiše softver slučajnim odabirom (quick pick).

Ukoliko igrač koristi pomoćni listić za uplatu igre na sreću TV Tombola Bingo na kojem nije odštampan Bingo joker broj, može usmenim putem zahtjevati quick pick uslugu.

Odredba iz prethodnog stava ovog člana se primjenjuje sve dok se ne iskoriste zalihe 37., 38., i 39. serije redovnog kola i zalihe 506. serije vanrednog kola pomoćnih listića igre na sreću TV Tombola Bingo 15 od 90.

Ova Pravila (opšti uslovi) obvezuju ugovorne strane.

Član 5.

Igračem u igri Bingo joker smatra se lice koje je sa priređivačem zaključilo ugovor iz čl. 4. ovih Pravila, uz dokaz da posjeduje potvrdu o uplati (dalje: potvrda), pod uslovom da je njen sadržaj zapisan na neizbrisivi optički disk, prije izvlačenja brojeva dobitne kombinacije igre TV Bingo 15 od 90 i igre Bingo joker, te da su ispisi na potvrdi i zapis na optičkom disku istovjetni.

Član 6.

Ovim članom priređivač utvrđuje slijedeće obavezne elemente Pravila igre Bingo joker:

1. osnovne odredbe;
2. naziv, opis i vrijeme trajanja igre;
3. uslovi za učešće u igri;
4. područje na kojem se priređuje igra;
5. pojedinačnu cijenu igre;
6. krajnji rok uplate za učešće u igri;
7. ukupnu vrijednost uplate pojedinog kola igre;
8. opis potvrde o uplati za učešće u igri;
9. visinu fonda i vrste dobitaka;
10. način, postupak i nadzor izvlačenja odnosno utvrđivanje dobitaka;
11. način objavljivanja iznosa fonda dobitaka i rezultata igre (utvrđivanje dobitaka);
12. način i rok isplate dobitaka;
13. način upoznavanja učesnika u igri s ovim Pravilima;
14. postupak u slučaju otkazivanja izvlačenja;
15. prijelazne i završne odredbe.

II. NAZIV, OPIS I VRIJEME TRAJANJA IGRE

Član 7.

U igri Bingo joker pogađa se dobitni petocifreni broj pod nazivom "Bingo joker broj", koji se dobiva izvlačenjem uz pomoć pet bubnjeva na način da se u svakom bubnju nalaze brojevi od 0 do 9.

Član 8

Igra Bingo joker priređuje se trajno po kolima, kao dodatna i neobavezna igra uz igru TV Bingo 15 od 90, u pravilu jednom sedmično, petkom.

Član 9.

Izvlačenje brojeva za igru Bingo joker obavlja se na način da Bingo joker broj čini pet izvučenih brojeva iz pet bubnjeva, a gledajući s lijeva na desno, pri čemu:

- prvi izvučeni broj predstavlja deset hiljaditu Bingo joker broja;
- drugi izvučeni broj predstavlja hiljadu Bingo joker broja;
- treći izvučeni broj predstavlja stoticu Bingo joker broja;
- četvrti izvučeni broj predstavlja deseticu Bingo joker broja;
- peti izvučeni broj predstavlja jedinicu Bingo joker broja.

III. USLOVI ZA UČEŠĆE U IGRI BINGO JOKER

Član 10.

Igrač igra Bingo joker neobavezno i istovremeno kada igra Bingo 15 od 90.

Član 11.

U igri Bingo joker učestvuju potvrde o uplati igre TV Bingo 15 od 90, uplaćene za važeće kolo (u skladu sa Pravilima igre TV Bingo 15 od 90), pod uslovom da ista sadrži odštampana jedan, dva, ili tri Bingo joker broja. Nakon uplate Bingo joker broja igrač je obavezan provjeriti sadržaj potvrde.

Član 12.

Pored ostalih uslova za sudjelovanje u igri Bingo joker, pored odredbi iz čl. 10. i 11. ovih Pravila, u svemu važe odgovarajuće odredbe Pravila igre TV Bingo 15 od 90.

IV. PODRUČJE NA KOJEM SE PRIREĐUJE BINGO JOKER

Član 13.

Igra Bingo joker priređuje se na teritoriji Federacije BiH.

V. POJEDINAČNA CIJENA IGRE

Član 14.

Cijena za učešće u igri Bingo joker iznosi 1,00 KM po svakom odigranom Bingo joker broju.

VI. KRAJNI ROK UPLATE ZA UČEŠĆE U IGRI

Član 15.

Uplate za sudjelovanje u igri Bingo joker primaju se do roka određenog u Pravilima igre TV Bingo 15 od 90.

O krajnjem roku za primanje uplate priređivač je dužan upoznati igrače isticanjem obavijesti na svim prodajnim mjestima.

VII. UKUPNA VRIJEDNOST UPLATE POJEDINOG KOLA IGRE BINGO JOKER

Član 16.

Uplatu pojedinog kola igre Bingo joker čini iznos primljenih uplata za učešće u igri Bingo joker, u pripadajućem kolu igre TV Bingo 15 od 90.

VIII. OPIS POTVRDE O UPLATI ZA UČEŠĆE U IGRI

Član 17.

Pomoćni listić i potvrda o uplati za učešće u igri Bingo joker u svemu su istovjetni opisima pomoćnog listića i potvrde iz Pravila igre TV Bingo 15 od 90 (član 17. i 18.).

IX. VISINA FONDA I VRSTE DOBITAKA

Član 18.

Fond dobitaka u igri Bingo joker utvrđuje se na osnovu vrijednosti uplate za učešće u pojedinom kolu, u skladu sa članom 16. ovih Pravila.

Fond dobitaka u igri Bingo joker iznosi 60 % od ukupne uplate tekućeg kola, iz stava 1. ovog člana i u potpunosti se dijeli u kolu za koje je izvršena uplata.

Član 19.

U igri Bingo joker postoji (5) pet vrsta dobitaka koji se ostvaruju u slučaju da je pogođeno 1 ; 2 ; 3 ; 4 ; 5 brojeva gledajući s desna na lijevo i to :

- **BINGO JOKER 1**

Uplaćene potvrde za učešće u igri Bingo joker čiji je posljednji jedan broj (broj na jediničnom mjestu) identičan sa brojem na jediničnom mjestu izvučenog Bingo joker broja (pogođen jedan broj izvučenog Bingo joker broja gledajući s desna na lijevo).

- **BINGO JOKER 2**

Uplaćene potvrde za učešće u igri Bingo joker čija su posljednja dva broja (broj na jediničnom i mjestu desetice) identični sa brojevima na jediničnom mjestu i mjestu desetice izvučenog Bingo joker broja (pogođena dva broja izvučenog Bingo joker broja gledajući s desna na lijevo).

- **BINGO JOKER 3**

Sve uplaćene potvrde za učešće i igri Bingo joker čija su posljednja tri (3) broja (broj na jediničnom mjestu, mjestu desetice i mjestu stotice) identični sa brojevima na jediničnom mjestu, mjestu desetice i stotice izvučenog Bingo joker broja (pogođena tri broja izvučenog Bingo joker broja gledajući s desna na lijevo).

- **BINGO JOKER 4**

Sve uplaćene potvrde za učešće u igri Bingo joker čija su posljednja četiri (4) broja (broj na jediničnom mjestu, mjestu desetice, stotice i mjestu hiljade) identični sa brojevima na jediničnom mjestu, mjestu desetice, stotice i hiljade izvučenog Bingo joker broja (pogođena četiri broja izvučenog Bingo joker broja gledajući s desna na lijevo).

- **BINGO JOKER 5**

Sve uplaćene potvrde za učešće u igri Bingo joker čijih su svih pet (5) brojeva (broj na jediničnom mjestu, mjestu desetice, stotice, hiljade i mjestu desethiljadite) identični sa brojevima izvučenog Bingo joker broja (pogođeno svih pet brojeva izvučenog Bingo joker broja gledajući s desna na lijevo).

Fond dobitaka se dijeli na:

- Bingo joker 5 10%
- Bingo joker 4 10%
- Bingo joker 3 20%
- Bingo joker 2 30%
- Bingo joker 1 30%

Ako u pojedinom kolu igre Bingo joker nema dobitaka Bingo joker 5, kompletan fond za tu vrstu dobitka se dodaje fondu dobitaka Bingo joker 4.

Ako u pojedinom kolu igre Bingo joker nema dobitaka Bingo joker 5 i Bingo joker 4, ili nema dobitka Bingo joker 4, fond te vrste dobitka se dijeli u omjeru 50%:50% na dobitke Bingo joker 3 i Bingo joker 2.

Ako u pojedinom kolu igre Bingo joker nema dobitaka Bingo joker 5, Bingo joker 4, Bingo joker 3, ili samo Bingo joker 4 i Bingo joker 3, fond te vrste dobitaka se dijeli u omjeru 50%:50% na dobitke Bingo joker 2 i Bingo joker 1.

Član 20.

Iznos pojedinačnog dobitka utvrđuje se tako da se fond dobitaka namijenjen za taj dobitak podijeli ukupnim brojem ostvarenih dobitaka. Na svakom od uplaćenih brojeva može se ostvariti dobitak Bingo joker broj.

Dobitak više vrste isključuje dobitak niže vrste za svaki pojedinačno uplaćeni Bingo joker broj.

X. NAČIN, POSTUPAK I NADZOR IZVLAČENJA ODNOSNO UTVRĐIVANJA DOBITAKA

Izvlačenje dobitaka

Član 21.

Javno izvlačenje dobitnog Bingo joker broja u igri Bingo joker nadzirat će Komisija koja prati regularnost izvlačenja brojeva igre na sreću TV Bingo 15 od 90. Komisija se sastoji od tri člana od kojih je jedan član predstavnik Ministarstva finansija Federacije Bosne i Hercegovine.

Tehnikom izvlačenja brojeva rukuje ovlaštena osoba priređivača, na osnovu Uputstva generalnog direktora.

Član 22.

U toku izvlačenja dobitaka iz člana 21. ovih Pravila vodi se zapisnik kojeg svi članovi Komisije potpisuju. Zapisnik mora sadržavati: mjesto, vrijeme, način izvlačenja dobitaka, uplatu u tom kolu, izvučeni dobitni Bingo joker broj. Zapisnik o izvlačenju priređivač dostavlja Ministarstvu finansija.

Utvrđivanje dobitaka

Član 23.

Dobitak, odnosno dobitke, utvrđuje priređivač a potvrđuje Komisija za utvrđivanje dobitaka u sastavu od najmanje tri člana. Članove Komisije imenuje priređivač.

Komisija je dužna zapis na optičkom disku deponovati u trezor prije početka izvlačenja.

Član 24.

Komisija za utvrđivanje dobitaka o svom radu sačinjava zapisnik, čiji je način rada reguliran posebnim uputstvom.

XI. NAČIN OBJAVLJIVANJA IZNOSA FONDA DOBITAKA I REZULTATA IGRE (UTVRĐIVANJA DOBITAKA)

Član 25.

Izveštaj o uplati i fondu dobitaka pojedinog kola igre Bingo joker objavljuje se prije početka samog izvlačenja.

Nezvaničan izveštaj o rezultatima igre pojedinog kola igre Bingo joker objavljuje se nakon javnog izvlačenja.

Član 26.

Privremeni izveštaj sadrži najmanje ove podatke:

- redni broj kola;

- datum izvlačenja;
- izvučene brojeve po redoslijedu izvlačenja (Bingo joker broj);
- broj dobitaka i iznos dobitaka po vrstama;
- uplatni broj potvrde ostvarenog dobitka Bingo joker 5 (5 pogodaka);
- iznos primljene uplate;
- nagradni fond;
- iznos fonda određen za pojedine vrste dobitaka;
- rok za prigovore;
- ostala obavještenja koja su potrebna učesnicima u igri.

Član 27.

Konačni izvještaj sadrži najmanje ove podatke:

- redni broj kola i datum izvlačenja;
- iznos uplate i fond dobitaka;
- broj i iznos dobitaka;
- rok zastare isplate dobitka;
- uplatne brojeve potvrda opravdanih i neopravdanih prigovora;
- ispravke eventualnih greški predhodnog kola.

Konačni izvještaj potpisuje generalni direktor priređivača.

Privremeni i konačni izvještaj objavljuju se u jednom od sredstava javnog informisanja.

XII. NAČIN I ROK ISPLATE DOBITAKA

Način isplate

Član 28.

Dobitak sa jedan, dva, tri, četiri i pet pogođenih brojeva Bingo joker se isplaćuju na svim prodajnim mjestima priređivača.

Član 29.

Pri isplati dobitka igrač je dužan predati potvrdu.

Dobitna potvrda je ona za koju se provjerom putem on-line sistema utvrdi da je dobitna.

Uz predaju potvrde, dobitnik je dužan predati na uvid svoju ličnu kartu, ukoliko je dobitak oporeziv po važećem zakonu.

Rok isplate

Član 30.

Isplate dobitaka Bingo joker 5, Bingo joker 4, Bingo joker 3, Bingo joker 2 i Bingo joker 1 vrši se u pravilu dan nakon javnog izvlačenja.

Isplata dobitaka zastarijeva u roku od 30 dana od dana objavljivanja konačnog izvještaja.

Član 31.

U slučaju da dobitnik na jednoj potvrdi ostvari dobitak u igrama TV Bingo 15 od 90, Bingo plus i dobitak u igri Bingo joker, dobitke će potraživati i podizati istovremeno.

Neisplaćeni dobici

Član 32.

Nakon isteka roka iz člana 30. ovih Pravila, neisplaćeni dobici prenose se u fond neisplaćenih dobitaka.

XIII. NAČIN UPOZNAVANJA UČESNIKA U IGRI S OVIM PRAVILIMA

Član 33.

Ova Pravila će se objaviti u jednom od sredstava javnog informisanja.

Član 34.

Ova Pravila nalaze se na svim prodajnim mjestima priređivača i web stranici priređivača.

Priređivač je dužan omogućiti igračima upoznavanje s ovim Pravilima, odnosno dati ih na uvid.

XIV. POSTUPAK U SLUČAJU OTKAZIVANJA IZVLAČENJA

Član 35.

Priređivač može iz opravdanih razloga otkazati zakazano izvlačenje.

U slučaju da se otkáže zakazano izvlačenje, izvlačenje će se obaviti u skladu sa Pravilima TV Tombole Bingo 15 od 90.

XV. PRIJELAZNE I ZAVRŠNE ODREDBE

Član 36.

Priređivač je dužan čuvati zapise potvrda na neizbrisivom optičkom disku najmanje dvije godine računajući od dana održanog izvlačenja određenog

kola, osim u slučaju kada je pokrenut sudski spor radi ostvarivanja prava iz učešća u igri Bingo joker te se tada zapisnici čuvaju do pravosnažnosti sudske odluke.

Član 37.

Za rješavanje sporova koji proisteknu iz učestvovanja u igri Bingo joker, mjesno i stvarno je nadležan Općinski sud u Sarajevu.

Član 38.

Ova Pravila stupaju na snagu danom donošenja a primjenjivati će se narednog dana od dana objavljivanja u jednom od sredstava javnog informisanja o čemu odlučuje generalni direktor svojom odlukom. Generalni direktor će, svojom odlukom, odrediti datum početka primanja uplate za igru na sreću Bingo joker i ista će se objaviti u jednom od sredstava javnog informisanja.

Broj: 01-6-1426-8-1-MM/12.

Dana: 04.09.2012. godine

P R E D S J E D N I C A

Ivana Bunoza,s.r.